

Oqaluuserisassanut nassuiaat

(Inatsisartunut sivisunerpaamik ilaasortaasimasoq)

Maannalu oqaluuserisassatut siunnersuutigineqartunut naatsumik nassuiaateqassaanga.

Oqaluuserisassat suliarineqarput Inatsisartut taakkulu ataatsimiititaliaasa inissitsitersinnaanissaannut Naalakkersuisullu qinerneqarsinnaanissaannut iliuusissat pisariaqartumik iliuuserineqartariaqartut aallavigalugit.

Inatsisartut Siulittaasoqarfiannik Naalakkersuisunillu qinersisoqareerpat oqaluuserisassat ukiakkut ataatsimiinnissap tungaanut utaqqisinneqarsinnaanngitsutut Naalakkersuisunit isigineqartut oqaluuserineqarnissaat siunertaralugu immikkut ittumik ataatsimiittoqarnissaanik Naalakkersuisut kissaateqarnerlutik nalunaaruteqarnissaat utaqqimaarneqassaaq. Immikkut ittumik ataatsimiittoqarnissaanik aalajangiisoqarsinnaassappat tamatuma paasilluaqqaarnissaa Inatsisartut pisariaqartippaat. Siulittaasoqarfiup nutaamik qinigaasup suliassaq tamanna isumagissavaa tamannalu pillugu kingusinnerusukkut paasissutissiissuteqassallutik.

Taamaattoqarnissaata tungaanut inissitsiterluni ataatsimiinneq oqaluuserisassat agguanneqartut tunngavigalugit ingerlatissagipput siunnersuutigineqarpoq. Oqaluuserisassanut siunnersuut taanna akerlerineqassappat oqaluuserisassanut ataatsimiititaliaagallartumik *Inatsisartunit* toqqarneqartumik pilersitsisoqarnissaa isumagissavara.

Oqaluuserisassatut siunnersuutigineqartunut oqaasissaqartoqarnerluni?

Taamaattoqarpasinngilaq, taamaattumillu oqaluuserisassani immikkoortumut 3-mut ingerlaqqissaagut.